

Probarik ez duen arren, Debrek uste du Kelkalek egin dituela Parisko atentatuak

Polizia guztiak atzetik zituen gaztea ostiral arratsean hil zen tiroketa batean

Khaled Kelkal hil zen Kherenegun arratsean, Lyon aldean, jandarmekin izandako tiroketa batean. Hilabete bazen Vaux-en-Velingo gazte hau Frantziako polizia eta jandarma guztiek bilatzen zutela, eta iragan asteazkenetik giza ehizketa itzel bat zeramaten Lyongo eskualdean harrapatzeko xedez. Barne ministroak uste du bera dela azkenaldiko atentatu gehienegilea.

ALLANDE SOKARROS / BAIONA

Andre Lorant Jandameriako jeneralak emandako datuen arabera, Kelkal hil zen ostiral arratseko 19.45ak inguruan, Lyondik hogeitak kilometrorik mendebaldean kokatuta den Vaugneray herriko Maison Blanche auzoan. Jandameriako arduradun horrek emandako argibideen arabera, Kelkalen heriotza gertatu zen EPIGN jandarma paraxutisten eskudroi bateko talde batekin izandako tiroketan. Jeneralak zein prokuradoreak azaldu zuten, jandarmek Kelkal inguratu zuten Maison Blanche auto-bus geltokitik hurbil zegoelarik, eta errenditzeko agindua eman zioten. Datuemaile beren arabera, Kelkalek, aitzitik, 7.65 kalibreako pistola bat ateratu zuen eta militarrei buruz tiro egiten hasi zen. Hauek, orduan, iharduki zioten, eta han bertan hil zuten.

Guztira, berrogei bat tiro egin ziren hogeita hamar bat segundu iraun zuen enfrontamenduan, eta jandarmen aldetik ez zen, ordea, zauriturik ere izan. Tiroketa hau izan baino lehen beste bat egon zen aurretik handik ehun metro inguruan, Yseron errekararen aldean. Iturri ofizialek diotenez, auzo hartako bizilagun batek jandarmen agindu postua abisatu zuen 19.30tan arropa militarrekin jantzita zegoen gizon bat ikusi zuela oihantetik irteten. Lau jandarma joan ziren orduan esandako tokirat, eta lehen tiroketa izan zuten, gerorago Kelkal zela jakingo zuten gazte batekin. Lehen tirokaldian zein bigarrean beren burua babesteko egin zutela tiro erran dute jandarmek, eta Polizia Judizialak lekuko batzuk itaundu zituen berehala gertera hauen egiaztatzeko.

ASTEAZKENEAN HASITAKO GIZA EHIZKETA

Kelkalen hiltze hau apur bat ustekabez gertatu da, zeren iragan asteazkenaz geroztik jandarmek Lyondik hogeitak kilometrorik den baso menditsuko eskualdean egindako giza ehizketaren ope-



Jandarmek beren burua babesteko egin zuten tiro, fiskaltzak dioenez.

AFP

razio itzela emaitzarik gabe baitzen eta arintzen hasiak baitziren. Izan ere, hiru egun eta bi gauez 760 jandarma inguruk egin zuten arakatzek ez zuela Kelkalen harrapatzerik eragin ikusita, dispositiboa 200 jandarmatara gutxitu zuten.

Operazio hau asteazken goizean hasi zuen jandarma patruila batek Vaugnerayko oihanean, lekuko batek salaketa bat egin ondoren, kanpatzen ari ziren lagun batzuk kontrolatu nahi izan zituztelarik. Horietatik batek fusil ponpadun batekin tiro egin

zuen, eta jandarmek larri zauritu zuten ihardukitzean. Denbora berean beste pertsona batek ihes egitea lortu zuen, eta gerorago mapa batean eta material zenbaitetan aurkitutako hatz markei esker, Kelkal zela egiaztatu ahal izan zuten. Tiroketa hau gertatu

Espetxean egindako integrista

PARIS

Khaled Kelkal 1971ko apirilaren 28an jaio zen Aljeriako Mostaganem herrian, baina hilabete bat zuela, bere familia Frantziara aldatu zen, Lyon inguruko Vaulx en Velin herrira alegia. Hamar anai-arreben arteko laugarrena, Kelkal ez zen giro integrista batean hazi, gurasoak islam erlijioaren jarraitzaile zintzoak baziren ere. Aita langabezian dago orain, hogeitaz lan-tegi berean beharrean aritu ondoren. Nordine anaia, berriz, Ensisheimgo (Alsazia) kartzelan dago, lapurreta egiteagatik.

Inguru zail batean bizi arren, Kelkalek ez zituen ikasketak utzi eta 1990. urteko ekainera arte ez zuen Poliziarekin inolako arazorik izan. Denbora horretan Poliziak Lyongo auzo marjinaletan ohitura bihurtzen ari zen ekin-tzagatik atxilotu zuen: gazteek auto handi bat lapurtu, denda baten kontra bota eta barrukoa ostentzen zuten. Era horretan egindako hiru ebasketatan parte hartzeaz akusaturik, Kelkal espetxean sartu zuten, eta 1991ko apirilaren 19an hiru urteko espetxe zigorra ezarri zioten. Bi urte geroago,



bere errekurtsioak huts egin zuen eta lau urteko jaso zuen.

Espetxean bi urte besterik ez zituen egin Kelkalek, portaera onagatik baldintzapeko askatasunean geratu baitzen 1993an. Nolanahi ere, kartzelako urte haiek eragin handia izan zuten Khaled gaztearen bizitzan, islamista erradikala bilakatu baitzen. Atera zenean ezagunek ikusi ahal izan zuten bizar txikia zuela, eta Grappiniere auzoko meskitara maiz joaten zela, lehen ez bezala.

Familiak Aljeria sorterrira bi-

dali zuen Khaled, eta bertan arazoak izan zituen agintari militarrekin, GIA eta beste talde armatuentzat arma trafikoan aritu zela uste baitzuten. 1993ko udan Aljeria utzi eta Frantziara itzuli omen zen, honi buruz datu handirik ez badago ere.

Joan den uztailako 15a arte Kelkalek ez zuen inon arrastorik utzi. Egun horretan, bera eta beste bi lagun ez ziren Poliziaren kontrol batean geratu eta tiro egin zieten agenteei. Poliziak orain uste duenez, baliteke Kelkal eta beste lagunak uztailaren 11n Abdelbaki Sahraui Parisko 18. barrutiko meskitako imam-a eta FISeko sortzaileetako bat tiroz hil zuten artean egotea.

Nolanahi ere, Kelkal Paris eta Lyon arteko AHTren trenbidean abuztuaren bukaeran bonba bat jartzeaz besterik ez dago oraingoz akusatuta. Lehergailuak ez zuen eztanda egin, eta Poliziak Khaleden hatz markak aurkitu zituen aparailuan.

Kelkalen argazkia non-nahi agertu da Frantziako leku publikoetan. Baina Lyon inguruko baso batean perretxiko bila zebilen herritar batek baizik ez zuen bere aztarna aurkitu.

eta berehala beste jandarma patruila batek jatorri aljeriako bi gazte atxilotu zituen gunetik atzetik ihes egiten ari zirelarik.

Abdelkader izeneko bi gazte hauek Vaux-en-Velin hirian bizi dira, eta Kelkali laguntza ematen ziotela susmatzeagatik Polizia Judiziala galdekatzen ari zaie Lyongo komisaldegian. Larriki zauritua izandakoa, berriz, Karim Koussa deitzen da eta Lyongo CHU eritegian dago oraindik. Hiru gazte horiek Kelkalen adiskideak zirela ohartuta, eta hatz marken egiaztapena izan aurretik, jandarmek sekulako giza ehizketarako operazioa abian jarri zuten, Lyon-Paris AHTko burdinbidean, iragan abuztuaren 26an, gertatutako atentatu saioagatik bilatzen ari ziren hogeita lau urteko gazte harrapatzeko. Vaux-en-Velin Lyondik hurbil den hirikoa baitzen Kelkal, segurtasun neurri handiak hartu zituzten ostiral gauean, gerta zitezkeen protesta ekintzei aurre egiteko gisan, baina ez zen antzeko ezer izan.

DEBREK KELKAL AKUSATU Kelkalen hiltzearen ondotik egindako deklarazio batean, Jean-Louis Debre Frantziako Barne ministroak argibide batzuk plazaratu zituen. Horien arabera, Kelkalek erabilitako 7.65 kalibreako pistolaren balek eta Abdelramam Sarhau imam-aren erailketan, iragan uztailaren 11n, aurkitutako balazalek zein Bron hirian (Rodano), uztailaren 18an, polizia patruila batek bide kontrol batean izandako tiroketaren ostean aurkitutakoek perkusio bera daukate. Horrek erran nahi luke, bere ustez, Kelkal eta bere lagunak izan direla ekintza guztien egileak. Gainerat, Barne ministroak zera adierazi zuen: «Bestetik, susmoa daukat talde bera dela Parisen gertatutako atentatu batzuen atzean». Hala ere, Debrek ez zuen daturik eman adierazpen horien egiaztatzeko.

LEHERGAILUAK AURKITU DITUZTE

Sisteronetik (Proventza Garaiko Alpeak) hurbil den Entrepierrres herrian, jatorri alemaniarreko familia baten etxean, 44 kilo lehergai eta 800 detonagailu harrapatu zituen Poliziak, aljeriar islamista taldeen laguntza sare baten aukako operazio batean. Jean-Louis Bruguiere epailearen aginduz egindako sarekada horretan hamazortzi lagun atxilotu zituzten asteazkenean, baina horietatik hamaika libratu egin dituzte. Gainontzeko zazpiak Avignon eta Digneseke Poliziategietan dira. Bestalde, atzo bertan gutxienez lagun bat atxilotu zuten Apt herrian (Vaucluse).

27. TOLOSAKO ABESBATZ LEHIAKETA
Urriak 2tik 13ra abonoak salgai jarriko dira arratsaldeko 5etatik 9etara TEEko bulegoan San Juan kalea 2F.